

## Акафист Честному и Животворящему Кресту Господню

### Кондак 1

**Приидите, христоименитии людие,/ составим похвалу Честному Кресту,/ на нем же Христос, Царь Славы, руке распростер,/ возведе нас на первое блаженство,/ из негоже низпадохом прелестию змиевою./ Ты же, о пресвятый Кресте,/ яко имеяй присущую тебе силу Распятаго Христа,/ спасай и сохраняй от всяких бед любовно зовущия ти:// Радуйся, Честный Кресте, всерадостное знамение нашего искупления.**

### Икос 1

**Ангелов лица, яко Божии служителие, Крест обстояще, вольную страсть Христа Жизнодавца прославляют. Мы же страданьми Того вечныя смерти избавльшеся, подражая Горним Силам, радостно взываем:**

**Радуйся, Кресте, яко на тебе Христос Бог наш,/ волею руке распростер, спасение наше содела;**

**радуйся, яко распростершимся на тебе Христом преступление Адама и Евы,/ простерших руке ко древу запрещенному, упразднися.**

**Радуйся, яко воздвижену бывшу на тебе, аки преступну, Законодавцу,/ древняя клятва, яже на нас бывшая, потребися;**

**радуйся, яко содеявшимся на тебе, странным таинством род человеческий/ от тли смертныя свободися.**

**Радуйся, яко Пострадавшим и Умершим на тебе/ жало смерти сокрушися;**

**радуйся, того ради страдания/ Бог с человеки примирися.**

**Радуйся, Честный Кресте,/ всерадостное знамение нашего искупления.**

### Кондак 2

**Видя падших человеков, Господи, Ты вочеловечився, крест и смерть вольно плотию претерпел еси за род наш, да от смерти вечныя избавиши исповедающия Тя, Сына Божия и вопиющия Ти: Аллилуиа.**

### Икос 2

**Разум человекь изнемогает в постижении веля тайны Твоего, Христе, воплощения и вольнаго за ны страдания: како Ты, Бог сый безстрастный, страсть крестную, яко человек, претерпел еси и сие орудие смерти Твоея**

соделал еси источником жизни и спасения всем благочестно в Тя верующим и хвалебно воспевающим:

**Радуйся, Кресте, на немже содеяся таинство, / от века предопределенное;**

**радуйся, яко на тебе совершися наше искупление, / многообразне во образех и сенех предъявленное.**

**Радуйся, яко умерый на тебе Жизнодавец, Кровь и воду источи, / имиже грехи наша омываются;**

**радуйся, яко каплями Святейшей Крове Его / греховныя струпы душ наших очищаются.**

**Радуйся, Кресте, якоже древо животное, / еже есть посреде рая Божия, христианом вожденный;**

**радуйся, плодами бессмертия умно нас питающий / и надеждою Жизни Вечныя малодушие наше ободряющий.**

**Радуйся, Честный Кресте, / всерадостное знамение нашего искупления.**

### **Кондак 3**

**Крест Твой, аще и древо видимо есть существом, но Божественною одеяно есть силою, и чувственное миро выявляемо, умно наше чудотворит спасение, подвизая пети Тебе: Аллилуиа.**

### **Икос 3**

**Имуще пред очима нашими Крест Пресвятый, святолепным поклонением той почитаем распеншагося ради на нем Спаса Христа, и, лобызая, взываем:**

**Радуйся, Кресте, прославленный / послушанием и страданием Христовым;**

**радуйся, возвеличенный возвышением на тебе Сына Божия, / Иже весь мир от падения Адамля воздвиге.**

**Радуйся, яко сбывшагося на тебе ужаснаго таинства земли ужасеся и вострепетá, / аки бы хотящи поглотити законопреступныя;**

**радуйся, яко заклавшую на тебе Агнцу Божию завеса храма раздрáся / и жертва ветхозаветная упразднися.**

**Радуйся, Кресте, яко распадшуюся под тобою камню, каменносердечнии роди еврейстии неверием от Бога отпадóша,/ благодати же священства и царства лишишася;**

**радуйся, яко омрачившуся солнцу в страсти Христовой/ ночь многобожия прейде и свет вѣры возсия.**

**Радуйся, Честный Кресте,/ всерадостное знамение нашего искуплѣния.**

#### **Кондак 4**

**Бурею злобы дышуще и завистию движими, первосвященницы иудейстии скрыша в землю Крест Твой, Христе Боже, да не будет обличением безумие их; но той, яко сокровище драгое, из недр земли возсия, тщанием благочестивыя царицы Елены обретенный и на радость всему миру явленный, с богокрасною песнию: Аллилуиа.**

#### **Икос 4**

**Видевше тогда христианстии людие Честнаго Креста обретение, прославляху распеншагося на нем Христа Бога, “Господи, помилуй”, — взывающе. Мы же ныне, подражающе им, прославляем Крест Его святыи хваленьми сицевыми:**

**Радуйся, Кресте, в землю сокровенный и оскверненное грехами наше естество земное освятивый;**

**радуйся, явлением своим из недр земных хулителей воплощения и Божества Христова посрамивый.**

**Радуйся, яко Пострадавый на тебе плотию прия всяку власть на Небеси и на земли, да всех и вся к Богу Отцу приведет;**

**радуйся, яко Умерый на тебе яко человек силою Божества Своего сокруши заклеты ада и изведе оттуда души праведных.**

**Радуйся, Кресте, яко разбойник благоразумный, Христу сраспявыйся, Того исповедавый, тобою, аки лестницею, на Небеса възде;**

**радуйся, яко и всех отсечением страстей Христу сраспинающихся возводиши в Царствие Небесное.**

**Радуйся, Честный Кресте, всерадостное знамение нашего искупления.**

#### **Кондак 5**

**Господи, при Моисее иногда пророце точною образ Креста Твоего являем побеждаше врази Твоя, ныне же самый Крест Твой имуще, помощи просим: укрепи Церковь Твою и даруй ей победы на враги, да расточатся вси врази Твои, не вопиющий Ти: Аллилуиа.**

### **Икос 5**

**Честнаго Креста, Христе, действо прообразив Амалика в пустыне Синайстей: егда бо простираше руце, креста образ творя, укрепляхуса людие; ныне же все вещей сбытие в нас исполнися: днесь крест воздвизается, и демони бегают, днесь тварь вся от тли свободися, яко вся Креста ради возсияши нам дарования. Темже, радуящеся, вопием:**

**Радуйся, Кресте, оружие Христово страшное,/ егоже демони трепещут;**

**радуйся, яко силою на тебе Распя́таго Христа́/ бесовстии полчища далече прогоняются.**

**Радуйся, яко силою действующия в тебе Божественныя благодати/ победы на сопротивныя христолюбивым людем даруются;**

**радуйся, яко от тебе, яко высокоросленнаго и многоплодовитаго древа Христова на тебе страда́ния,/ плоды жизни и спасения нам произраста́ют.**

**Радуйся, Честный Кресте,/ всерадостное знамение нашего искупления.**

### **Кондак 6**

**Проповедником силы и Божества Христова явися иногда животворящее древо Крестное, егда прикосновением своим воскреси мертваго и к жизни возведе его, еже видевшю, мнози от иудей и язычников познаша велию благочестия тайну: яко спасения ради человеческого, Бог во плоти явился и страсть крестную претерпе, да спасет вопиющия Ему: Аллилуиа.**

### **Икос 6**

**Якоже древо райское превелие, возвысися на Голгофе Честный Крест Христов, отонудуже во всю вселенную распростре мысленный ветви благодати и Распеншагося на нем: под егоже сению обретают прохладу палимии зноем страстей и хотящии благочестно жити о Христе Иисусе. Темже и мы, благодати Того причастницы, весело взываем:**

**Радуйся, святы́й Кресте, древом жи́зни,/ Адама ради в Едеме насажденным, преображе́нный;**

**раду́йся, новым Адамом, руце на тебе распростёршим,/ миру я́вленный.**

**Раду́йся, яко под сень благодатнаго защищё́ния твоего́/ вси вернии прибега́ют;**

**раду́йся, яко милосердием Дарова́вшаго на́м/ тебе каю́щихся грешницы огня геенскаго избега́ют.**

**Раду́йся, Кресте, утешение на́ше/ в скорбех и печа́лех;**

**раду́йся, живительная отрадо и по́мощь/ изнемогающим в борьбе с прилогами страстей, мира и диа́вола.**

**Раду́йся, Честный Кресте,/ всерадостное знамение нашего искупле́ния.**

### **Кондак 7**

**Хотя явити роду человеческому благости и милосердия Своего неизследимую пучину, Крест Твой, Господи, дал еси нам тверда блюстителя и прогонителя демонов. Темже вси мы, иже в Тя верующии, прославляем величие страсти Твоя, благодарно поюще Тебе: Аллилуиа.**

### **Икос 7**

**Дивны дела явил еси, Господи, Крестом Твоим Честным: распеншуся бо Ти на том плотию, вся тварь изменися: солнце лучи своя сокры, основания земли восколебахуся, ад сокрушися державою власти Твоя и изведе юзники, яже от века содержал есть. Сего ради увязаем той сими песненными цветы:**

**Раду́йся, Кресте, яко пострадавшему на Тебе вся тварь сострада́ше,/ яко Творцу своему и Влады́ще;**

**раду́йся, яко силу Того́ и Божество́/ свидетельствовваху солнце помрачением и земля колеба́нием.**

**Раду́йся, яко Умерый на тебе не удержан бысть в ме́ртвых,/ но, разрушив державу смерти, в третий день воскре́се;**

**раду́йся, яко воскресшу Тому проповедь ева́нгельская,/ от лика апостольскаго наченшаяся, во вся концы земли изы́де.**

**Раду́йся, Кресте, яко тобою кумирслуже́ние/ и многобожие языческое упраздни́ся;**

**раду́йся, яко тебе ради правая вера во Единого Бо́га,/ в Троице славимаго, по всей земли утверди́ся.**

**Радуйся, Честный Кресте,/ всерадостное знамение нашего искупления.**

### Кондак 8

**Странно Бога вочеловечшася и на Кресте распята бывша мысленно видяще, устранимся суетнаго мира, ум на Небеса преложше. Сего ради Бог на землю сниде и на Крест възиде, да тем, аки лестницею, на Небеса возведет вопиющия Ему: Аллилуиа.**

### Икос 8

**Днесь Адам со Евою веселится, предлежащий видяще Крест, имже поражен бысть супостат, иже древле в раи вкушением запрещеннаго плода тех прельстивый и пленники себе сотворивый. Темже и мы, срадующеся праотцем нашим о избавлении от пленения нашего душевнаго, благоговейно воспеваем:**

**Радуйся, Кресте, яко на тебе Пастырь добрый душу Свою/ положи за овцы Своя и даже до ада сниде, ища заблудших;**

**радуйся, яко Той не презре дело руку Своею, Адама со Евою,/ но со инеми праведники исхити я из ада, яко из челюстей зверя крепкаго, и в рай всели их.**

**Радуйся, яко на тебе пригвожденному Христу пламенное оружие плещи даде/ и Херувим, Едем хранящий, отступи от Древа Жизни;**

**радуйся, яко мы, ныне крещением возрожденнии, во Христе новые людие,/ невозбранно причащаемся райския пищи.**

**Радуйся, Кресте, жезле силы Христовы, от Сиона посланный,/ имже мы пасемся на пажитех евангельских учений;**

**радуйся, яко тобою невредими сохраняемся от волков душегубных,/ яко львоуе рыкающих и ищущих, кого поглотити.**

**Радуйся, Честный Кресте,/ всерадостное знамение нашего искупления.**

### Кондак 9

**Всяких бед и козней вражиих избави ны, Кресте треблаженный, яко приемый благодать и силу от пригвожденнаго на тебе Христа, Емуже яко Богу и Избавителю нашему благодарственно и хвалебно поем: Аллилуиа.**

### Икос 9

**В**етийство всякое земнородных не довлеет к прославлению Креста Твоего, Господи, на немже спасение наше соделал еси; темже, недоумевающе восхвалити той по достоянию, взываем сице:

**Р**адуйся, Кресте, яко вознесенный на тебе Спас мiра/ мнози люди в познание Свое призва и до ныне призываёт;

**р**адуйся, яко возсиявый на тебе, аки на свѣщнице,/ Свет истинный вся концы земли светом Боговедения озаряет.

**Р**адуйся, яко ныне Восток и Запад/ Пострадавшего на тебе прославляют;

**р**адуйся, яко и ты, яко подножие Христо́во,/ вси вернии, возносяще, прославляют.

**Р**адуйся, яко от тебе, яко от неизсякаемаго исто́чника,/ христоименитии людие обилие благ вечных почерпают.

**Р**адуйся, Честный Кресте,/ всерадостное знамение нашего искуплѣния.

### Кондак 10

**С**паستися хотящим нам и под сень защищения твоего прибегающим, буди помощник, пресвятой Кресте, сохраняя ны от всех зол силою на тебе Распятого Христа, Емуже яко Богу и Избавителю нашему благодарственно и хвалебно поем: Аллилуиа.

### Икос 10

**С**тена еси, ограждающая нас от бед и напастей, Кресте всечестный, и столп крепкий противу лица вражия, к немуже невидимии борителие приступити не смеют, боящися взирати на силу Твою. Сего ради с верою ограждаемся святым твоим знаменiem и весело воспеваем:

**Р**адуйся, пречестный Кресте Христо́в,/ от нападения духов злобы нас защищай;

**р**адуйся, от различных стрѣл их/ невредимы ны сохраняяй.

**Р**адуйся, яко от знамения твоего, с верою благочестно творимаго,/ вся силы ада, яко дым от ветра, исчезають;

**р**адуйся, яко тобою вся крѣпость их,/ яко воск от лица огня, истаивает.

**Р**адуйся, яко святии мученицы, знаменiem твоим ограждашеся и имя Христово призвавше,/ всякий, вид мучений мужественно претерпѣша;

**радуйся, яко преподобнии отцы помощью силы Божества, знамению твоему присущия,/ бесовская страхования и страстей возстания победиша.**

**Радуйся, Честный Кресте,/ всерадостное знамение нашего искупления.**

### **Кондак 11**

**Пение всеумиленное приносим Ти, всечестный Кресте, и смиренно молимся распятому на тебе Христу Богу нашему, Иже дарова нам тебе во отраду и утешение в скорбех, да страстию Своею избавит нас от страстей душевредных и научит благоверно воспевати Ему: Аллилуиа.**

### **Икос 11**

**Светом благодати Божией, таинственне ти присущия, просвети наша душевная чувства, Кресте пресвятый, да тою озаряеми и наставляеми, не поткнемся о камень соблазна, но да возможем путем заповедей Божиих правошествовати во всей жизни нашея, воспевающе ти сице:**

**Радуйся, непрестающих чудес Христовых вестниче и милосердия Его/ к роду человеческому проповедниче;**

**Радуйся, Кресте, рода человека обновление/ и Новаго Завета Христова печать и утверждение.**

**Радуйся, торжество веры христианския/ и благонадежный якорю упования нашего;**

**Радуйся, святых храмов Божиих украшение/ и домов благочестивых ограждение.**

**Радуйся, полей и вертоградов благословение;/ радуйся всех стихий освящение.**

**Радуйся, Честный Кресте,/ всерадостное знамение нашего искупления.**

### **Кондак 12**

**Благодать Твою всемогущую подаждь нам, Господи, да последуем Тебе, Владыце нашему, взявше крест наш, не гвоздьми пригвождающеся тому, но трудами, воздержанием и смирением, да тако причастницы будем страданий Твоих, от нихже истекают потоцы Жизни Вечныя, напаяющия вся правоверныя, благочестно поющия Ти: Аллилуиа.**

### **Икос 12**



**Поюще** величие твое, всечестный Кресте, восхваляем ты вси, яко победоносный скипетр Царя Небеснаго, нашего же спасения всерадостное знамение, темже и вопием:

**Радуйся**, Кресте, православных христиан держáво/ и несокрушимое их ограждéние;

**радуйся**, святителей украшéние/ и всех подвижников веры и благочестия сила и подкреплéние.

**Радуйся**, Кресте, от колыбели и до гроба на всех путех жизни нас ограждáй/ и по смерти на воздушных мытарствах от духов злобы нас защищáй;

**радуйся**, яко под знамением твоим почивающии, умершии в вере и благочéстии,/ в последний день воскреснут в Жизнь Вéчную.

**Радуйся**, Кресте, явлением сво́им на Небесí/ предварити имый славное Второе пришествие Христóво;

**радуйся**, яко распеншии Христа и вси невернии узрят ты тогда и горце возрыдáют,/ любящии же Господа, зряще ты, вельми возрадуются.

**Радуйся**, Честный Крéсте,/ всерадостное знамение нашего искуплéния.

### **Кондак 13**

**О** Пречестный и Животворящий Кресте Господень, всех христиан утешение! Ты ныне предлежаща видяще, возводимся мыслию к распятому на тебе Христу, Емуже и молимся смиренно, да тебе ради помилует нас, грешных, и сподобит в селениих райских воспевати Ему: Аллилуиа.

**(Кондак читается трижды, затем 1-й икос)**

Всемирное Воздвижение  
Честнаго и Животворящего Креста.  
Сборник полного последования службы для мужского хора

© Редакция и составление Г.Смирнова

Москва, 2013

Подворье Патриарха Московского и Всея Руси  
Храм Живоначальной Троицы в Останкино

[www.profundo.ru](http://www.profundo.ru)